



Inatsisartunut ilaasortaq Anthon Frederiksen, Partii Naleraq  
MAANI

## § 37 naapertorlugu apeqquteqaammut nr. 2015-274-imut Rubininut tunngasumut akissuteqaat

Inatsisartut suleriaasianni § 37, imm. 1 naapertorlugu apeqqutit matuma kingulianiittut, § 37 naapertorlugu apeqquteqaammut 2015-131-imut malitseqartitsillutit, Naalakkersuisunut saqqummiuppatit.

26. november 2015  
Sagsnr. 2015-15435

Postboks 930  
3900 Nuuk

Tlf. (+299) 34 68 00

Fax (+299) 32 43 02

E-mail: mmr@nаноq.gl

www.naalakkersuisut.gl

### 1. Rubin-it misileraatit ukiorpassuarni nunatsinniik annissuunneqarsimasut apeqquteqaammi nr. 2015-131 Canada-mi USA-milu inissisimatinneqartut, qanoq naleqarpat?

#### Akissut:

Rubinit nunani allaniitineqartut maannakkorpiaq piviusumik nalilernerqarsinnaanngillat. Tamatumunnga pissutaavoq Aatsitassanut oqartussaasup pisussaaffiliinngitsumik missiliuilluni naliliisarnera, tunisinissaq sioqqutitsiarlugu pisarmat. Taamaaliornikkut naliliinermut, akigititaasimasut atornissaannut taarsullugu, maannakkorpiaq niuerfimmi akigititat aallaavigineqartarput. Rubini suli tunineqarsimangimmata, taakkua suli nalilersorneqanngillat.

Tassunga ilanngullugu oqaatigineqassaaq ujaqqanik paarineqartunik Aatsitassanut oqartussaasoq arlaleriarluni ornigulluni takusaasimammat.

### 2. Apeqqut 1-imut atatillugu ujaqqat toqqortarineqartut qanoq atorniarneqarpat?

#### Akissut:

Aatsitassarsiorluni misissuineq ingerlanneqaraangat, sumiiffiup pineqartup imminut akilersinnaanersoq misissuinissamut, tamatigut ujaqqanik misissugassanik tigusisoqartarpoq. Kalaallit Nunaanni aatsitassanut (ikummatissiassat pinnagit) tunngatillugu aatsitassarsiorluni misissuinissamut akuersissutinut atugassarititaasuni nalinginnaasuni ("Atugassarititaasut nalinginnaasut") §7 (703) naapertorlugu aatsitassanut oqartussaasoq sioqqutsisumik akuersissuteqarsimangippat, pisinnaatitsissummik pigisaqartup misissugassat tuniniarsinnaanngilai imaluunniit allatut tunniussinnaanagit. Pisumi pineqartumi ilaatigut ujaqqat aningaasaliisartunut takutitassatut aammalu suliaqarfissap pilerisaarutigineranut pisinnaatitsissummik pigisaqartup atorpai. Korund Aappaluttumeersoq aatsitassarsiorluni misissuinerup immikkoortuata nalaani piiarneqartoq, korund-ip piiaanerup immikkoortuata nalaani piiarneqartup pineqartarnerata assinganik pineqartarpoq. Tassa imaappoq korund aatsitassarsiorluni misissuinerup nalaani suliaqqinneqartoq, maannakkut piiaanissamut akuersissutip atuuttup, akuersissuteqarnerit il.il. ataanni maleruagassiivigineqartoq. Pingaarnertut siunertaasoq soorunami tassaavoq korund-ip ujaqqatut pinneraasiassatut pitsaassuseqartup tunineqarnissaa.

**3. Apeqquut 1-2-imullu atatillugu ujaqqat toqqortarineqartut ukiut ingerlanerini Canada-miit imaluunniit USA-miit ilai tuniniarneqarnissaat akuersissutigineqarsimavaa?**

**Akissut:**

Naamik - Canada-mi imaluunniit USA-mi ilaannik tuniniaanissamut True North Gems Greenland A/S akuersissummik tunineqanngilaq.

**4. Apeqquutit 1-imiit 3-mut atatillugu ujaqqat pineqartut qaqugu kalaallit nunatsinnut aningaasatigut iluaqusiinissaat naatsorsuutigineqarpa?**

**Akissut:**

Ujaqqat pinneraasiassat eqqaaneqartut qaqugu tunineqassanersut, ajoraluartumik maannakkorpiaq oqaatigineqarsinnaanngilaq, tassami piffissaq tunineqarfissaat suli inissineqanngimmat, kisianni naatsorsuutigineqarpoq TNG-p aatsitassarsiorfimmi tunisassiorneq aallartinniariapat, tunisassiatik tuniniarsarissagai.

**5. Ujaqqanik pineqartunik misileraasimaneq qanoq piffissalersorneqarsimava?**

**Akissut:**

Akuersissutip atorunnaarnissaata tungaanut pisinnaatitsissummik pigisaqartoq ujaqqanik pinneraasiassanik misileraasinnaassaaq. Tamanna pisinnaatitsissummik pigisaqartunut tamaginnut atuuppoq.

**6. Misileraaneq aallartinneqalermata isumaqatigiissut qanoq imaqarpa?**

**Akissut:**

Saffiugassap imarisaannik, pisumi matumani ujaqqap pinneraasiassap imarisaannik, misissuineq nalinginnaasumik misissuineruvoq, aatsitassarsiorluni misissuinerup immikkoortuani Atugassarititaasunit nalinginnaasunit maleruagassaqartinneqartoq. Ingerlatat sorliit immikkut akuersinertaqanngitsumik pisinnaatitsissummik pigisaqartumit suliarineqarsinnaanersut aammalu sorliit sioqqutsisumik akuersissuteqarfigineqartariaqarnersut, Atugassarititaasuni nalinginnaasuni ilaatigut allassimavoq. Aamma allassimavoq ujaqqanut misissugassat katersorneqarsimasunut pisinnaatitsissummik pigisaqartoq qanoq inissisimassanersoq, assersuutigalugu akuersissutip atorunnaarnerani paasissutissat nalunaarsukkat, qillerummit qaqqat aamma misissugassat allat tamaasa, pisinnaatitsissummik pigisaqartumit imaluunniit taanna sinnerlugu sumiiffimmut akuersissuteqarfiusumut tunngatillugu pissarsiarineqarsimasut, aatsitassanut oqartussaasup akeqanngitsumik tigusinnaavai.

Ujaqqanik misissugassanik annissuinissamut, tamatigut sioqqutsisumik akuersissummik pissarsisimanissaq piumasaaqataavoq. Tamanna avammut annissuinissamut akuersissummik taaneqartartumi pisarpoq. Taamaalilluni nassiussat ataasiakkaat tamarmik akuerineqartarput aammalu Aatsitassanut oqartussaasumi nalunaarsorneqartarlutik.

Ujaqqat misissugassat, Aatsitassanut oqartussaasup tamanna akuerereersimangippagu, tunineqarsinnaanngillat imaluunniit allatut allanut tunniunneqarsinnaanatik. Aatsitassanut oqartussaasup nakkutilliinermut oqartussaasutut, nakkutilliilluni suliassanik suliarinninnissamut pisariaqartillugu, pisinnaatitsissummik pigisaqartup suliaqarneranut ingerlataqarneranullu ilaasunut tamaginnut isersinnaanissaq sukkulluunniit piumasarisinnaavaa. Ilaatigut

nakkutilliilluni takusaanikkut aammalu toqqorsivimmiititanut allattuiffimmik pissarsinissamik piunasaqarnikkut tamanna pisinnaavoq.

Taamaalilluni ujaqqat taakkua iliuseqarfiginissaat pillugu immikkut isumaqatigiissuteqartoqanngilaq.

## **7. Isumaqatigiissut inatsisartunut ilaasortanut agguanneqarsinnaavaa?**

### **Akissut:**

Aap – Atugassarititaasut nalinginnaasut tamanit pissarsiarineqarsinnaapput aammalu ilaatigut Aatsitassanut Ikummatissanullu Aqutsisoqarfiup tuluit oqaasii atorlugit nittartagaani uani [www.govmin.gl](http://www.govmin.gl) nassaarineqarsinnaallutik.

Inussiarnersumik inuulluaqqusillunga

Vittus Qujaukitsaq